

# MAVITETAPOJATSICA ITIONCAQUECA

## PEERERO

### Antsatantaquemparoca

Ocatica iroguenti antsatantaquemparoca mavitetapojatsica itioncaqueca Peerero. Chooqa quenquejajianquitsica itioncajiaqueneri joriojia tsarotentajiacarica Jesoshi oaguetananquitsica quepatsipaequi icantajitica Ponto, Garashia, Caparoshia, Ashia, aisa Vitinia (1 Pe. 1.1). Cotanquitsi itsipajia iquenquejajiaque itioncajiaqueneri maasano quemisantajiaquerica Jesoshi. Peerero irio jorio, irio itigarancane Jesoshi. Irocashi itioncacotaqueri irira Peerero otsipaqui paperiqui (Ya. 1.12-5.42; 8.14-25; 9.32-12.19; 15.7-11). Iquenquejajiaque itioncaquero ocatica paperi irooca ajagantsiniqui 64, cotanquitsi tee intsajiteji quero ichooaqueguenti itioncaquerogueti. Chooqa quenquejajianquitsica itioncaquero ichooaquegueti guinteninintsiqui pajitatsica Vavironia, itsipajia iquenquejajiaque arica ichooaque Peerero Iromaqui itioncaquerogueti.

Itioncajiaqueneri quemisantajiaquerica Jesoshi iragamajajiaquempari amataajiatsica, aatoniji yamatavijajiguiritsi intsatacaajiaquerigueti teeca iroomajateji, aisa aatoniji yovashiantajianajiro iquemisantajiaquegueti (3.17). Icamantajiaqueri quero incojiaquempani quemisantajiaquerica Jesoshi (1.1-15). Itsavetacotajiro coramanitica icantashitatiimojiacarigueti Jesoshi, aisa iquenquejacaajiaqueri icantajiaqueca tsavetantajiajicsicani coramanitica (1.16-21). Icantajiaqueri icantajiavetacaca amataajiatsica (cap. 2), aisa iquenquetsatacotaquero incoraquetajategueti Jesoquirishito acaniqui quepatsiqui (cap. 3).

**1** <sup>1</sup>Naroguenti Shimo Peerero tioncajiaquempiroca oca. Naroguenti irajaanire aisa itigarancane Jesoquirishito. Imaica nontioncajiaquempi maasano aviatimpajia quejejaquenaca naatimpajia aventajigarica Jesoquirishito Arioshite Aajjavajica aatoniji apega. Cameetsavaetaque paventajiacarigueti. Tampatica yoaguetaquero maasano, irootaque yagavejacaantajiaquemfica paventajigari. <sup>2</sup>Namanacoventajiaquempiqueate pintsatimentamajajiaquerinijite Aapani Irioshi aisa Amajirote

Jesoshi cameetsanijite arimpanijite incavintsajamajajiaquempi, aisa inchoocatacaajiaquempiqueate cameetsa aatonijite pishoshoguiteventajigaro taaca opajitapae.

**Icantajiaqueriqueate quero  
incojiaquempani  
inquemisantamajajiaquerigueti  
Jesoquirishito**

<sup>3</sup>Irira Aapani Irioshi inintacajaiacaji anconoajiaquempari, aisa anquejejaquempari ancomajamajiaquempa. Imaica

atsajiaqueritarite yagavejacaantajiacajica anquemisantamajajiaqueriniji, aisa antajiaqueronijite maasano inintaguetica. <sup>4</sup>Inetsanataqueroqueate icantacajica, yagavejacaajiacaji antajiaquequeate cameetsaguetatsica aatonijite aquejejijaaritsi teeca inquemisantajigueti antaguishejiguiroca teeca oncameetsateji, manaqueate anquejemajajiaquempari iriatimpa. <sup>5</sup>Imaica piquemisantajiaqueri, irootaquequeate nocantantajiaquempica nonintaque pincomajamajajiaquempaja. Ariqueate pincomajamajajianaquempagueti irooqueate pisavicaventajiaque pintsamajajianaqueroqueate inintaguetica Aapani Irioshi. <sup>6</sup>Pintsamajajianaqueroqueti ariqueate pintampishitashijianaquero maasano teeca oncameetsateji. Pintampishitashijianaqueroqueti ariqueate pantsiperejacojianaquempa. Pantsiperejacojiaquempagueti ariqueate pimpincatsajianaqueri Aapani Irioshi pishineventajiaquemparoqueate pantajiaquero inintaguetica iriatimpa. <sup>7</sup>Pimpincatsamajajiaquerigueti ariqueate pimpintsajiguempari maasano papiguemisantarijiateni. Pimpintsajiaquemparigueti papiguemisantariteni, ariqueate pincavintsajajigueri aisa maasano caquinte. <sup>8</sup>Pinquejejaquempagueti imaica arimpaqueate pintsamajajianaqueri Amajirote Jesoquirishito pinquejianaquempariqueate iriatimpa, ariqueate aato piquemisantamampeajiga intati. <sup>9</sup>Iriaqueate teeca inquejetempaji imaica iquejevetacari caarica amenamajatatatsi, iquejevetacariquea shamponcajari teenicate intsamajateriji Amajirote, aisa ipeacocaró icavintsajaquerigueti Aapani Irioshi yaajirigueti ishetajinirigueti maasano iguempevaere. <sup>10</sup>Cotanquitsi aviatimpajia, napiguemisantarijiateni, aatoqueate piquejigari iriatimpajia mana picancani pantajiaquero

nocantajiaquempica imaica cameetsanijite pintsamajajianaquenijite arimajainintacajiaquempi Aapani Irioshi pinquemisantajiaqueri aisa irashintamajajiaquempi. Pinquejejaquempagueti imaica aato povashiantajiajaro piquemisantajigueti. <sup>11</sup>Coajicaqueate poajianaqueguete jenoqui inquitequi ichoocatiguete Amajirote Jesoquirishito Meshiantatsica cameetsaqueate irajaiavajempi pinconoajiaquempariqueate ontaniqui igantagueti irimajirontamajataquempaquate.

**Icantajiaqueriqueate arimpa  
inquenquejajianaqueroja  
itsatacaajiaquerica**

<sup>12</sup>Pitsajiaqueroqueate notsatacaajiaquempica, aisa piquemisantamajajiaqueroqueate, iroomajacatari; cotanquitsi irosatiquea nonquenquejacaajajempiro. <sup>13</sup>Otampaticataquequea nonquenquejacaapinijajempiro choocatirajanaguete acaniqui notsinoqui, quejearoca noitsaarevanco, <sup>14</sup>notsaquetarite quempejitacotapoji savincaguiteri nometojantaquempaca nojocapanajantero notsino, itsatacaaquenarotari Amajirote Jesoquirishito. <sup>15</sup>Nonquejetaquempaquate imaica cameetsanijite pintsamajajiaquenijite aatonijite pipeacojiajaro nometojanajeguete.

**Cameetsavaequequeate  
inquemisantamajajiaqueri  
tsavetantamajatarica Quirishito**

<sup>16</sup>Oraqueate notsavetantajiguiriguete Amajirote Jesoquirishito nocantajiaquempigueti incoraquetajeguete incovejencamajatapojaje teequeate oratica naashijiguemparoji intati, namenamajajiaqueritarite coramani icantashitatiimojiaquenaguete ontaniqui otsempiqui icovejencavaequequeate. <sup>17</sup>Icovejencatacaqueritari Aapani

Irioshi, yonigaantacaroquea iroganejen-care iquenquetsajencajitanaquegueti jenoqui oganejencaguitetacagueti, icanti: "Iricatica irio Irijani, nopintsatacaca, noshineventamajatacari."

<sup>18</sup>Noquemajiaqueroquea naatimpajia iquenquetsajencajitanaquegueti inquitequi itsipajiaquenagueti Amajirote ontaniqui otsempiqui.

<sup>19</sup>Aisa atsajiaque arimaja icantamajajiaque tsavetantajiguironica icanqueca Aapani Irioshi coramani. Imaica cameetsataque pinquenquejajiaqueroja maasano itioncajiaqueca cameetsanijite pintsamajatimentajiaqueronijite, manatarite oquejetacari tsivorentsi itsivojitirigueti pitsecariqui cameetsanijite onconijaguitetimenquenijite. Pinquenquejajianaqueroquea arejevae-tantanaquempaca oratica savincaguiteri incoraquetantajempaca iriratica quejetacarica irira shigompiri amenaqueca osavincaguitetamaquegueti, ariqueate iroguiconijataquempiro pishirequi.

<sup>20</sup>Coramani itioncacojiquero Iguenquetsatsarequi Aapani Irioshi icantajiaquerica tsavetantirinica. Imaica nonintaque pintsajiaquequeate tee inchoocateji agavejanquitsineca inchiqiuojita incantaque iriatimpa taaca opajita ocantacotaque. <sup>21</sup>Teenicate inquenquejashijiaquemparo intati irirajia tsavetantirinica. Manatarite iquemisantamajajiaqueri Aapani Irioshi ariqueate itsatacaciaqueri Ishire Aapani Irioshi quero incantajigue.

#### Tsatacaantantajiatsica amataajiatsica

**2**<sup>1</sup>Cotanquitsiqueate coramani inchoocagarantajiaquequeate aisa tsavetantajiatsica amatavijajiaquerica ishiraerijia. Ariqueate onquejetanaquempami imaica inchoocagarantajianaquequeate tsatacaantantajiatsica amatavijantajiananquitsineca. Iromana-

cojianaqueriqueate Amajirote metojaventajiacajica, aisa intsatacaantantajiaque teeca iroomajaca Quenquetsatsarentsimajaca, incomitacaajiaquempari quemisantajiavetemparineca, cotanquitsiqueate taampinaqueate interoncajitaqueri irisatiqueate quejetacaantajianquitsine. <sup>2</sup>Oraqueate icancanigueti intsatacaantantajiaque inquemisantajiaqueriqueate oshequini caquinte, ariqueate inquejejianaquequempari irantaguishejianaquequeate taaca opajitapae teeca oncameetsateji, irooqueate onquenantapojaquempa intsojencantajitanaquemparoca Quenquetsatsarentsimajaca tsavetantaquerica Quirishito. <sup>3</sup>Irirajiaqueate amataajianquitsineca irinintavintsajiaquequeate imentaquipae intsatacaajiaquempiqueate taaca opajitapae inquenquetsatashijianaquempaqueate intati, cotanquitsi Aapani Irioshi jac icantacotsitacari coramani. Interoncajiaqueriqueate coajica, aato ipeacotaro.

<sup>4</sup>Arimpate coramani irirajia irashivan-tijitete Aapani Irioshi antaguishejiaqueroca teeca oncameetsateji teequeate irajiajeriji, ipishoncajiaqueri ontaniqui isaviji yashitacojiaqueri opitsecaquegueti. Imaica icancaniqueate inchoocajiaque oraniqui irosati incantimentantajiaquemparica coajica. <sup>5</sup>Ariqueate iquejetaca igonorojiani Noeni antaguishejiaqueroca teeca oncameetsateji. Teequeate irajiajeriji, manaqueate itejaqueneri inrojencia incani anaacojianaqueriqueate maasano, ariqueate iteroncajianaca yojocajajiaqueate. Iriguentinivaniqueate yaajivavaji Noeni jerijia aisa ijitanerija vegarajianquitsica 7. Iriraqueate Noeni iriotaque tsavetantimojiavetacarica igonorojia, icamantajiavetacariqueate incomajamajajiaquem-pame. <sup>6</sup>Aisa coramani iguintenijiavetacagueti oshequini caquinte Soromaqui

aisa Gomoraqui, oshequiamajatatiguini-maja tsovironaquipae. Cotanquitsi iriatimpajia yantaguishejianaquero-queate taaca opajitapae teeca oncameetsateji. Irootaquequeate icatsimatantajiacarica Aapani Irioshi yoguivariashijia-queriqueate paamari yapevoquijajiaqueriqueate maasano, iteroncamajajiaque-roqueate maasano tsovironaquipae teequeate querica choocatanajatsineca. Ariqueate iquejetaquero imaica cameetsanjite intsatimentajiaquenijite maasano antaguishejiatsica taaca opajitapae teeca oncameetsateji iriguenti ogomarojiaque incatsimajia-querigueti oncoramanitapojajegueti interoncajiaquerigueti. <sup>7-8</sup>Ariqueate ichooaqueni oraniqui apaniro caquinte icantajitica Iroteni, cameetsaqueate ichooaqueni. Igantagaqueate yamena-pinijiaqueri guintenijiatsica oraniqui yantaguishejiaquerogueti taaca opajitapae teeca oncameetsateji, aisa iqemajiaqueri injaguishejiaquegueti ishimampojancacaqueate oshequi, aisa ishoshoguitevaetaca. Irootaquequeate yaantavajarica Aapani Irioshi itigarancajiri ontaniqui aatonijite itaatsi iriatimpa.

<sup>9</sup>Aritarite itsataque Amajirote quero incoquemparo iraaajajateri quemisanta-majajianquitsica aatoniji agavejajiguiri taaca opajita coraquetashijiaquerineca, aisa itsaque quero incantomajajiaqueri maasano teeca inquemisantajigueriji, ariqueate aavaepojempa iramenacotan-tajiaquemparica irantsipetacaamajajia-quempari. <sup>10</sup>Irioquea incatsimamajajia-que irirajia guijatacojiguiroca inintaguishejiguica. Iriatimpajia iroguenti isavicaventajiaque yantaguishejiaquero taaca opajitapae teeca oncameetsateji. Teequeate impincatsajigueriji Amajirote, aisa injashinatacari irashivantijitete Aapani Irioshi

teequeate impincatsajigueriji. <sup>11</sup>Irirampani ashivantijite caaviji yanaajiaqueri nijashinatacarica yagavejavaevecaquea, cotanquitsi teequeate impigatimajiguempariji incantajiaqueri Amajirote irantsipetacajiaquempari.

<sup>12</sup>Imaica noncantajiaquempi irirajia-queate amataajiatsica teequeate intsajigueji quejejiacaqueate tomirishipaequítica isavicaventajiguro taaca opajitapae inintajiaqueca. Iroguenti ichooatashijiaque iraaajitaqueriqueate irimetojajitaqueriqueate. Iriatimpajia mana injashijiajaro taaca opajitapae teeca intsajigueroji. Irantsipetacaajiquempariqueate interoncajitaqueriqueate quejejiacaqueate tomirishipaequítica. <sup>13</sup>Irantsipejiaquempaquatee iroorijite yatsipetacaantajiaica iriatimpajia. Icancani isavicaventajiguro taaca opajita ishineventajiaica. Ooshiatsi apashiventacaqueate pitsipajiacarigueti pishecajiacagueti aisa ishinejiacagueti yamatavijantajiaquegueti. <sup>14</sup>Teequeate iramenashitemparoji manquigarentsi querocaca yamenajiaqueca. Igantagaqueate yantaguisshetaquero taaca opajitapae teeca oncameetsateji, teequeate irovashianteroji. Yagavejantajiacarica teesaconaca intampishitashijigueroji teeca oncameetsateji, iquempevaetacaajiacari. Ari canca iriatimpajia inevaguecaro ajaararontsipae, itsajiguirotari quero incojiaquempani irajaarantajiaquempa-gueti, cotanquitsi incatsimatimentajia-queriqueate Aapani Irioshi interoncajia-queri. <sup>15</sup>Yovashiantajianaquerotarite tampaticavoquitanquitsica, iquenashijianaca. Manaqueate iquejejiacari Varaameni irijanite Veori, inintavintsavetacaqueate irajaaranquempame yantaqueroqueate teeca oncameetsateji iraantaquemparomequeate. <sup>16</sup>Cotanquitsi coajicaqueate irio aashino

cantomajaquerica, icantimentaqueri yantaqueca teeca oncameetsateji. Iriovetaca canaanquitsica teeca intsavetempaji inquenquetsate, cotanquitsi iquempetanacari caquinte iquenquetsatanaque icantomajaqueri tsavetantavetacaroca icanquerica Aapani Irioshi, iticaavaqueri aatoniji iquejetanajari shoncacotanquitsica.

<sup>17</sup>Iriatimpajia mana iquejejiacarochaquirejigueti motojavetatsica. Aisa mana iquejejiacarocha osetigueti yamenajitirogueti arica ontejapojaque incani, cotanquitsi yaanajiro tampija, tee ontejeji. Aritarite iquejejiaca iriatimpajia itsatacantajaveca cotanquitsi mana yamatavijantajiaque intati. Coajica incatsimatimentajiaqueri Aapani Irioshi impishoncajiaqueri opitsecamajaquegueti, icancaniqueate irantsipejiaquempa. <sup>18</sup>Oshequi isemejigui, aisa iquenquetsaguishetashijia. Yantaguishejiaque taaca opajitapae teeca oncameetsateji ariqueate yovashiantacaajivajiri iriaqueraca comajajiananquitsica quemisantavecaroca Quenquetsatsarentsimajaca. <sup>19</sup>Icantajiaqueri: “Imeshiajiaquemparite Aapani Irioshi imaicaqueate cameetsaqueate pantajiaquero taaca pinintaque. Aatoqueate icatsimatimentajiguimpuro.” Icantajavecaqueate imaica, cotanquitsi iriatimpajia teequeate iragavejajigueti irantajiaquequeate taaca inintaque, iroguenti yantaguisheetaque teeca oncameetsateji teroncacajiaquemparineca coajica. Pitsajiaquetarite teequeate inchoocateji agavejanquitsineca inchiqiojita irovashiantajero iriatimpa taaca opajitapae agavejamajaquerica. <sup>20</sup>Coramani yantaguishejiaquero teeca oncameetsateji. Ariqueate itsajiaquerigueti Amajirote Jesoquirishito Meshiantatsica yovashiantajianaquero.

Cotanquitsi imaica inquejetanajempagueti iroaqueragueti tequeratagueti intsajigueriji arimpaqueate irijajianaqueri, arimpaqueate irogaajianaquempani. <sup>21</sup>Aatomeja itsajiguirome Quenquetsatsarentsimajaca tsavetantirica Quirishito. Itsajiavetacarotarite cotanquitsi yovashiantajianajiro, irotaquequeate arimaja irantsipemajajiaquempa. Aisa ipiashijianajaro yantaguishejiguica arimpaqueate ijajigui. <sup>22</sup>Icantajitarite imaica: “Iriaqueate shiishi icamaranquigueti, yoguipijairo ishecatavajaro.” Aisa icantajiti: “Pincajaterigueti chancho irisati piashitanajemparone intigaritajemparo sampovatsa.” Ariqueate iquejetaca quemisantajiavetatsica piashijianajaroca yantaguishejiguica.

#### Incoraquetajegueti Amajirote

**3** <sup>1-2</sup>Napiguemisantarijiateni nopintsamajajia, coramaniqui notioncajiaquempi nonquenqueajacamentajiaquempironijite iquenquetsatacojiaqueca tsavetantajiguirinica Aapani Irioshi, jero aisa notsavetantajiaqueca naatimpajia itigarancanejia Jesoshi, nocamantajiaquempigueti maasano icantajiaquenaca Amajirote Meshiantatsica. Imaica notionquitajajimpiqueate aisa nonquenquejacaamajajiaquempuro pinquenquejacojiaquenijite cameetsaquetatsica.

<sup>3</sup>Nonintaquetarite irogueti pinquenquejamajiaque querocotanaquempani oncoramanitapojajegueti pajinigueti aapojempa savincaguiteri vegaratapajaatsineca, inchoocajianaquetarite savicaventajianaqueroneca irantaguishejiaquero teeca oncameetsateji. Irishirontimentajianaquempiqueate incantajianaquequeate: <sup>4</sup>“¿Querocampate icoraqueti imaica Quirishito? Arimpate icantajitini incoraqueate.

Manaqueate imetojaguetanaji avaesatiniteni, cotanquitsi tequeratampate incoraqueateji imaica. Jac arimpate coramani iroaqueraguetei ipeacaacaro quepatsi irosati imaica choocatanansi.”

<sup>5</sup>Teenicate irinintajigüe inquenquejajijeroji coramani ipeacaacaro Aapani Irioshi inquitepae aisa quepatsi, ipeacaantaguetacarouea iguenquetsatsare. Oraqueate quepatsi osotoajatapojaque quentijaniqui, manaqueate ovogoretacocarou quentijani. <sup>6</sup>Irooquea aisa oja anaanaquero maasano quepatsi coramani, iteroncantajiacaca maasano choocantaguetaroca, yojocajajiaca. <sup>7</sup>Cotanquitsi imaica mana icanque: “Nontotetavaquemparota quepatsi jero aisa inquite aatota noteronquitaro imaica choocantajiacaroca.”

Cotanquitsi oraqueate coajica incatsimamentajiaqueriguetei maasano teeca inquemisantajigüeji ariqueate intaagueatouero maasano.

<sup>8</sup>Imaica, nopintsajiacaca, aato pipeacotarou ocatica. Iriraqueate Amajirote tee inquejejajij aatimpajia: 1,000 ocarati ajagantsi iriatimpa yamenaquero oquejetimotacari apajencatiro savincaguiteri; ari oquejetaca aparo savincaguiteri ariqueate oquejetimotacari 1,000 ajagantsi. <sup>9</sup>Cotanquitsi imaica choocacantajianquitsica: “Icantaveca Amajirote, ‘Noncoraqueate.’ Imaica tequerata incoraqueateji manaquea ipeanaca ontaniqui. Imaica aato icoraquetaji.” Cotanquitsi naatimpa noncantajiaquempi arimajaqueate incoraqueate, tee impeguempajij intati. Iroguenti inintaque incantashitatijaianaquempata teeca inquemisantajiguerijij irovashiantajianaquerota yantaguishejiguica teeca oncameetsateji inquemisantajiajerita, teenicate irinintenate impeguempa apaniro. Irootaqueate

imaica pamenajiaque tequerata incoraqueatantempajij, cotanquitsi incoraqueatejequeate.

<sup>10</sup>Oraqueate incoraqueatejateguetei Amajirote mana irimapocapojajempa inquejetapojempari aitsitantatsica imapocantiguetei yaitsitantiguetei. Ariqueate ompojimatanaque jenoqui inquitequi togn, ariquea ompeaqueempa inquite. Intaaguetanaquempa catsirincateri, taai, jeri aisa impoquiropae, maasano interoncamaajatanaquempa. Ariquea onquejetanaquempa aisa quepatsi ontaaqueempa, ontsipatanaquemparo maasano taaca opajitapae choocantaguetaroca, maasano ariqueate onteroncamaajatanaquempa.

#### **Aapani Irioshi impeacaajempa otsipa quepatsi aisa inquite**

<sup>11</sup>Iroorijite atsajiaque onteroncaguetanaquempa maasano, ¿querocampapincojiaquempajij imaica? Iroosacanicate imaica aviatimpajia pincomajamajiaquempa pinquemisantamajigueriqueate Aapani Irioshi. <sup>12</sup>Poguijajiajajero aapojempaguetei savincaguiteri intaantaquemparoca Aapani Irioshi inquite, ariqueate avejancaguetanaquempa maasano choocantaguetaroca. Pisavicaventamajiaqueroja maasano inintaguetica iriatimpa cameetsanjite taampinanjite irinetsanaguetaquero taampina. <sup>13</sup>Aatimpajia aguijajiaquero tarite iroaquerari inquite aisa iroaquerari quepatsi impeacaajempaca Aapani Irioshi coajica. Iroorijite icanque coramani impeacaajempa coajica otsipa oganejencamaajatanaquempate, aatoqueate ichoocatajij antaguishetajeronca teeca oncameetsateji, manaqueate oganejencaguitetaquempa maasano.

<sup>14</sup>Imaica aviatimpajia nopintsajiacaca, poguijajiaqueritarite incoraqueatejateguetei irinetsanataquero icanqueca. Irootaque-

queate noncantantajiaquempica imaica aatotagueti icoraqueti iintsija pincomajamajatemala, aato pantajiguero teeca oncameetsateji, iramenajiaquempinijite Aapani Irioshi piguintenimajajiguempa cameetsa. <sup>15</sup>Pamenajigüe imaica tequerata incoraquetaje Amajirote, manatarite inintaque inquemisantajiaquerita itsipapae caquinte cameetsanijite iraimentajiajaverinijite. Iriraqueate apiguemisantariteni Paavoro apintsajiacaca itioncajiaquempi iriatimpa aisa, icantajiaquempiqueate quejetarocanocantajiaquempica imaica. Iriguentarite tsatacaqueri Aapani Irioshi, irotaquequeate icantantajiaquempica. <sup>16</sup>Ariqueate iquejetiro iriatimpa imaica itioncaguétigueti itsavetantirogueti ocapae. Oconogarancaqueate itioncaguetaquequea manamajaguetanquitsica teequeate intsajitavaqueroji. Iriraquea teeca intsamajatero Iguenquetsatsare

Aapani Irioshi jerijia teemajaca inquemisantamajajigueroji mana yogaaiaquero intati icanqueca, iquejetacaajiacaro yogaaiaquero gueti otsipapae Itioncacaantaqueca Aapani Irioshi. Inchiqiojitarite inquejetacaantajiaquempa iriatimpajia.

#### **Ivegaraquero gueti icantajiaquerica**

<sup>17</sup>Imaica aviatimpajia nopintsajiacaca, pitsajiaquero tarite ocatica nocantajiaquempica, inchiqiojia yamatavijajiguimpitsija pigatsatantatsica, yovashiantacaajiguimpirotsija piquemisantamajajiguica. <sup>18</sup>Mana arimpaqueate pinquimoshirentanaque icavintsajiaquempigueti Amajirote Jesoquirishito Meshiantatsica, aisa pintsamajajianaquerija. Jameja ashineventajiguempari imaica, ariqueate acancaniqueate ashineventajiaquempari. Ari oncoquempa.